

ODRŽAN SASTANAK S NAČELNIKOM OPŠTINE ILIDŽA

24.02.2026 12:29



Dana 24.02.2026. godine održan je radni sastanak predstavnika Federalne uprave za geodetske i imovinsko-pravne poslove i Opštine Ilidža, u okviru implementacije projekta obnove premjera na području ove jedinice lokalne samouprave.

Na sastanku je konstatirano da su aktivnosti na obnovi premjera i uspostavi zemljišne knjige u potpunosti okončane za katastarsku općinu Vlakovo, čime je uspješno završen cjelokupan postupak uspostave katastra nekretnina za navedeno područje.

Za katastarske općine Blažuj i Osijek završene su aktivnosti u katastarskoj fazi postupka, uključujući

izlaganje podataka premjera i katastarskog klasiranja zemljišta na javni uvid. U narednom periodu planirana je uspostava, odnosno zamjena zemljišne knjige, čime će se zaokružiti proces uspostave katastra nepokretnosti i postići potpuna harmonizacija evidencija.

Trenutno je u toku izlaganje na javni uvid podataka premjera i katastarskog klasiranja zemljišta za katastarske općine Butmir i Hrasnica, a završetak ovih aktivnosti očekuje se u skorijem periodu. Kada je riječ o katastarskoj općini Doglodi, završene su pripremne aktivnosti za obnovu premjera, te je planirano da izlaganje podataka na javni uvid započne krajem marta 2026. godine.

Tokom sastanka usaglašene su i naredne aktivnosti na proširenju obuhvata projekta, uključujući pokretanje postupaka obnove premjera i za druge katastarske općine na području Opštine Ilidža, s ciljem potpunog uređenja katastarske i zemljišnoknjižne evidencije.

Obje strane izrazile su zadovoljstvo dosadašnjom realizacijom aktivnosti u okviru ovog izuzetno zahtjevnog i složenog procesa, te potvrdile opredijeljenost za nastavak saradnje i dalju uspješnu implementaciju projekta obnove premjera, u interesu građana i jačanja pravne sigurnosti u prometu nepokretnosti.